

**Siunnersuummut oqaaseqaatit****Nalinginnaasumik oqaaseqaatit****1. Aallarniut**

Piffissami matumani aaqqissuussaasumik suliffinnik inuttaligassanik neqeroorfiusumik, atorfinnik inuttaligassanik tamakkiisumik tamanik takussutissiinermik sulisartut suliffissarsiuussisarfinnilu sulianik isumaginnittut pissarsisinnaaffiannik, sulisitsisullu suliffinnik inuttaligassanik saqqummiussisinnaaffiannik imaluunniit sulisunik suliffeqanngitsunik piginnaasalinnik ujartuisinnaaffiannik internetimi suliffinnut nittartakkamik Kalaallit Nunaat peqanngilaq.

Suliaqartut arlallit internetti aqputigalugu suliffinnik inuttaligassanik saqqummiussaqaqartarput, amerlanerpaat suliffeqarfiusumi annikinnerusumut immikkut sammisaqarlutik, soorlu qaffasissumik ilinniagalinnut, peqqinnissaqarfimmut imaluunniit Danmarkimi suliffissarsiortunut saaffiginnittunik atorfinnik.

Tamakku killiliissutinik arlalinnik nassataqarput, suliffinnik inuttaligassanik saqqummiussinerit paasiuminaannerulerput, najugaqavissutullu suliffissarsiortut aamma naalagaaffigisami suliffeqarfinni suliffiit inuttaligassat akornanni tulluarsaalluarnissaq akimmisaartinneqarpoq. Kikkut tamarmik takusinnaasaattut suliffinnik inuttaligassanik saqqummiussanik amigaateqarnerup suliffissaaleqisut akornanni nuttartoqarsinnaanera annikillisarjaa, tamatumalu saniatigut nunami Suliffissarsiuussisarfinni sulisut naalagaaffigisamut tunngasumut suliffissaaleqisut suliffeqarfimmut attaveqalersinniarlugit ikiorsiiniarnerminni sakkussaqaanngillat. Aammattaaq suliffiit nunap avataaneersunut sulisartunut neqeroorutigineri *sioqqullugit* suliffiit inuttaligassat najugaqavissunut suliffissaaleqisunut naammattunut takuneqarsinnaasunngorlugit piviusutut saqqummiunneqarnissaasa isumannaarnissaannut oqartussaasut periarfissalupput. Tamakku kinguneraat nunani allani suliffeqarfiit suliniutinut angisuunut sulisartunik najugaqavissunik atorfinitsitsinissamut periarfissanik misissuinissaminnut periarfissaasa killeqarnerannik.

Aammalu maannakkut suliffeqartitsinermut periarfissanik toqqaannartumik ataqatigiissillugit suliffinnik ujartuineq pillugu ilisimasanik saqqummiussisoqarsinnaanngilaq, taamatullu piginnaanngorsaasutut pikkorissarnernik periarfissanik, nuttarnersitsiniarluni ikiorsiissutinik il.il.

Suliffissaaleqisunut ullumikkut kommunini Suliffissarsiuussisarfiit attaveqarnernik tamanik isumaginnipput, ilaatigut iliuusissatut pilersaarusiortarlutik, 'naqitsisarneq' isumagisarlugu, aammalu suliffeqarfinnit saaffiginnittunit suliffinnik innersuussisarlutik. Naqitsineq tassaavoq

suliffissaaleqisup suliffissaalequarnera tunngavigalugu pisortanit ikiorserneqarnissamik imaluunniit suliffissaaleqinermi ikiorsiissutisinissamik pisariaqartitsiuarneranik nalunaarsuisarneq. Suliffinnik nalunaarsuisarfiup amigaataanera pissutigalugu nammineq iliuseqarluni suliffissarsiortoqarsinnaananilu suliffissaaleqisup sulisitsisullu akornanni attaveqartoqanngilaq, taakku sioqqutsisumik imminnut immikkut ittumik nalunngereersuunngippata.

Nuna tamakkerlugu suliffinnut nittartagaq saqqummiunneqartussaammat siunnersuut saqqummiunneqarpoq, aammalu aallartisarnermiilli suliffissarsiortunut suliffinnik innersuussisarnermut atuilernissaq, nunatsinnilu suliffeqarfimmik tamarmiusumik tapersersuisitsinissaq, taamaalilluni Kalaallit Nunaanni suliffissaaleqinermik, sulisartullu ilinniarsimangitsut nunanit allaneersut amerlassusaannik annikillisaanissaq isumannaarniarlugit.

Suliffinnut nittartakkap atornissaanut Naalakkersuisut malittarisassianik aalajangersaasuullutillu tassuma naleqqussagaasarneranik isumaginnittuupput.

Suliffinnut nittartagaq pilersinneqarpat Kalaallit Nunaanni sulisartunik tikisitaqartarnerup inatsisiliornera pillugu Inatsisartut inatsisaannik nalunaarutaanillu allannguuteqarnissamut siunnersuutunik saqqummiussaqaarnissaminnut Naalakkersuisut siunertaqarput, taamaalilluni suliffinnut nittartakkami suliffimmik inuttaligassamik sulisitsisup saqqummiussinera tassaassalluni atorfirmik kalaallimik sulisartumik inuttaliisinnaanginneranut sulisitsisup uppersaanissaanut piumasaqaat.

## **2. Siunnersuummi immikkoortut pingaernerit**

### *1) Inatsisaasut atuuttut*

Suliassaqarfimmi inatsisaasut atuuttut tassaapput Suliffeqarnermi innersuussisarneq pillugu Inatsisartut inatsisaat nr. 5, 8. juni 2014-imeersoq. Inatsisartut inatsisaanni § 10-mi allassimavoq Naalakkersuisut nuna tamakkerlugu suliffiit inuttaligassat nalunaarsugaaffiannik pilersitsisinnaasut.

### *2) Siunnersuut*

Suliffinnut nittartakkap atornissaanut siunnersuut pingaernerusutut malittarisassianik aalajangersaavoq.

<b>Inatsisissatut siunnersuut inatsisinut atuuttunut naleqqiullugu</b>	
<i>Oqaasertaliineq atuuttoq</i>	<i>Inatsisissatut siunnersuut</i>
	<b>§ 1</b>
	Suliffeqarnermi innersuussisarneq il.il.

	pillugit Inatsisartut inatsisaat nr. 5, 8. juni 2014-imi makkuninnga allannguuteqassaaq:
<p><b>§ 10.</b> Naalackersuisut nuna tamakkerlugu suliffissanik nalunaarsuivimmik pilersitsisinnaapput, suliffissanik neqeroorutit, suliffissaaleqinermik allaffissornikkut aqutsinerup aammalu kisitsisitigut paasissutissiornissat nalilersuillunilu misissueqqissaarnissat siunertaralugit tunngaviusumik paasissutissat katersorneqarfigisinnaasaannik suliareqqinneqarfigisinnaasaannillu.</p> <p><i>Imm. 2.</i> Naalackersuisut imm. 1 malillugu suliffissanik nalunaarsuiffiup pilersinneqarnissaa pillugu malittarisassanik aalajangersaasinnaapput, taamatuttaaq suliffissanik nalunaarsuiffiup atornissaanut kommunalbestyrelsip pisussaaffii pillugit malittarisassaliorsinnaallutik.</p>	<p><b>1. § 10</b> imatut oqaasertalerneqassaaq:</p> <p>“<b>§ 10</b> Suliffissarsiortunik aamma suliffinnik neqeroorutinik nalunaarsuinnermut aqutsinermullu Naalackersuisut nuna tamakkerlugu suliffinnut nittartakkamik pilersitsisinnaapput.</p> <p><i>Imm. 2.</i> Kommunalbestyrelsip Kalaallit Nunaanni suliffinnik inuttaligassanik tamakkerlugit isiginninniarlutik suliffinnut nittartagaq atussavaa, suliffissarsiortunullu suliffiit innersuussissutigissallugit.</p> <p><i>Imm. 3.</i> Suliffissarsiortup suliffinnut nittartakkamut CV-ni inississavaa. Suliffinnut nittartakkap atorneqarneranik kommunalbestyrelse ilitersuissaaq, aammalu suliffissarsiortoq nammineq pisinnaangippat suliffissarsiortup CV-a suliffinnut nittartakkamut inississallugu.</p> <p><i>Imm. 4.</i> Suliffissarsiortup suliffinnut nittartakkami CV-ni nutarsartuartassavaa.</p> <p><i>Imm. 5.</i> Suliffinnut nittartakkamut tamanik takussutissiisumik CV-mik inissiinissaq suliffissarsiortuusutut aamma suliffeqarfimmut piareersimasuusutut isigineqarnissamut piumasaqaataavoq.”</p>
	<p style="text-align: center;"><b>§ 2</b></p> <p>Inatsisartut inatsisaat 15. juli 2015-imi atuutilerpoq.</p>

### 3. Pisortanut aningaasaqarnikkut aqutsinikkullu kingunissai

2015-imut Aningaasanut Inatsisissatut Siunnersuummi 1,2 mio. koruunit aningaasaliissutissat immikkoortinneqassasut siunertaavoq. Pisortat ikiorsiisutaanni sipaaruteqarnissaq akileraarutinilu isertitat amerleriarnissaat naatsorsuutigineqarpoq, suliffiit taakku sulisartunit

nunanit allaneersunit inuttaligaanatik suliffiit inuttaligassat kalaallinut ilinniagaqarsimangitsunut innersuunneqarsinnaassappata.

Suliffinnut nittartagaq Kalaallit Nunaanni suliffeqarfimmik ingerlalluarnerusumik nassataqartitsissasoq, taamaalillunilu pisortanut ilorraap tungaanut aningaasatigut isertitaqartitsissasoq naatsorsuutigineqarpoq. Akileraarutini isertitatut ilusilinnik annertunerusumik isertitaqartitsisoqassasoq aammalu pisortat ikiorsiissutaanni sipaaruteqartoqassasoq naatsorsuutigineqarsinnaavoq. Kommunit suleriaatsiminni allannguuteqarneq misigissavaat, allattoqarfimminnili akitsuineq misigissanagu.

#### **4. Inuussutissarsiorfimmut aningaasaqarnikkut aqutsinikkullu kingunissai**

Inuussutissarsiorfimmut siunnersuut toqqaannartuunngitsumik kinguneqassaaq, suliffinnut nittartakkami suliffissarsiortut tamarmik CV-minnik inissiisimalerpata suliffissaaleqisunik sulisitsisut pisariunnginnerusumik tamanik isiginnilersinnaassammata. Taamaattorli siunnersuummi inuussutissarsiorfiusumut piumasaqaateqartoqanngilaq, taamaalillunilu inuussutissarsiorfimmut aningaasaqarnikkut imaluunniit aqutsinikkut kingunissaqarani. Suliffinnut nittartakkap nutaap sulinnik inuttaligassanik saqqummiussinermi niuerfiusumik annikillisaassanngitsoq naliliiffigineqarpoq, tusagassiorfinni namminersortuni atorfinnik inuttassarsiorluni saqqummiussanik itisiliisunik sulii pisariaqartitsisoqassasoq naatsorsuutigineqarmat.

#### **5. Avatangiisinut, pinngortitamut inuillu peqqissusaannut kingunissat**

Siunnersuut avatangiisinut, pinngortitamut imaluunniit inuit peqqissusaannut kingunissaqanngilaq.

#### **6. Innuttaasunut kingunissat**

Sulisitsisut pisariunnginnerusumik nassaarinnissinnaalernerisigut innuttaasunut, taakkulu suliffeqarfimmut isernissaannut imaluunniit uteqqinnissaannut periarfissanut ilorraap tungaanut kingunissaqassasutut siunnersuut naatsorsuutigineqarpoq.

#### **7. Kingunissat allat pingaarutillit**

Siunnersuutip Naalagaaffeqatigiinnermut attaveqarneq siunneqarfiginngilaa, aammalu annertunerusumik namminersulersitseqataanani.

#### **8. Oqartussaasuni kattuffinnilu tusarniaaneriit**

Siunnersuut piffissami 10. juni 2014-imit 15. august 2014-imut makkununga tusarniaassutaasimavoq:

Namminersorlutik Oqartussani naalakkersuisoqarfiit, Kalaallit Nunaanni Sulisitsisut Peqatigiiffiat, NUSUKA, SIK, KANUKOKA, Kommuneqarfik Sermersooq, Qaasuitsup Kommunia, Qeqqata Kommunia, Kommune Kujalleq, IMAK aamma PIP.

Taamattaq siunnersuut Namminersorlutik Oqartussat tusarniaanermi nittartagaatigut innuttaasunut tusarniaassutaasimavoq.

Tusarniaanermi akissutit makkunanga pissarsiarineqarsimapput: Kalaallit Nunaanni Sulisitsisut Peqatigiiffiat, PIP, Kommuneqarfik Sermersooq, Kommune Kujalleq, IMAK aamma KANUKOKA.

Tullinguuttumi tusarniaanermut akissutit, aammalu tusarniaanerup nalaani allannguutissatut siunnersuutit suliarineqarput. Tusarniaanermut akissutit uingasunik naqinnilikkat pingaarnersiulluni nalilisoqarnera tunngavigalugu pingaarnerusortaat ilanngunneqartuunerat oqaatigineqassaaq.

Tusarniaanermut akissutit tamarmiutillugit Inatsisartuni ataatsimiititaliamut suliarinnittuusumut ilanngussatut nassiuuneqarput.

*Kalaallit Nunaanni Sulisitsisut Peqatigiiffiat inatsisissatut siunnersuummut oqaaseqaatissaqanngillaq. Taamaattorli suliffissarsiuussisarfii namminersortutut neqerooruteqartartunut suliffinnut nittartakkap unammillertuusariaqannginnera Kalaallit Nunaanni Sulisitsisut Peqatigiiffiata uparuarpaq.*

Atorfinnik inuttaligassanik saqqummiussat sulianik aalajangersimasunik sulisartunut pingaarutilinnut qinnutigisaq saaffeqartinniarlugu tusagassiorfinni namminersortuni saqqummiunneqartarnissaat nalileneqarpoq. Suliffinnut nittartakkap pingaarnertut siunertaraa kommunini suliffinnik innersuussiviit atorfinnut inuttaligassanut sulisartunik naleqquttunik innersuussinissamut periarfissaannik nukittorsaanissaq. Tamatuma ilaatigut nunanit allanit sulisartunik pisariaqartitsineq annikillisarinnavaa.

*PIP inatsisissatut siunnersuummut oqaaseqaateqanngilaq.*

*Kommuneqarfik Sermersooq nalinginnaasumik inatsisissatut siunnersuummut iluarisimaarinnipput, nunatsinnili suliffissarsiuussisarfinni danskinilu suliffinnik innersuussisarfinni suliasat isumalluutillu pigisaasut assigiinngitsuunerat sianigineqassasoq uparuaatigalugu.*

*Inatsisissamut oqaaseqaatini sulisartunik tikisitsisarnermut inatsit malillugu suliffinnut nittartakkami sulisitsisup inuttassarsiornera atorfinnik kalaallimik sulisartumik inuttalersinnaannginneranik sulisitsisup uppernarsaanissaanut piumasagaataassasoq inatsimmut oqaaseqaatini taaneqartoq Kommuneqarfik Sermersuup oqaatigaa. Inatsisitigut tunngavissaqannginneq pissutigalugu sulianik isumaginnittuni ataasiakkaanik paasinninnertut assigiinngitsunut nalunaarsugaasoq tunngavissiisinnaasoq Kommuneqarfik Sermersuup oqaatigaa.*

Suliffinnut nittartakkap pilersereerneratigut Kalaallit Nunaanni sulisartunik tikisitsisarnerup inatsisiliornera pillugu Inatsisartut inatsisaata nalunaarutaatalu allanngortinnissaannut siunnersuummik saqqummiussaqaarnissamut Naalakkersuisut siunertaqartut oqaaseqaatini ilanngunneqartoq tassunga oqaatigineqassaaq, taamaalilluni sulisitsisup suliffinnut nittartakkami suliffinnik inuttaligassamik saqqummiussinera tassaassalluni suliffinnik

sulisartumik kalaallimik inuttalersinnaasimannginneranut sulisitsisup  
uppernarsaasinnaaneranut piumasagaat.

Taamaalilluni allannguutip inatsisitigut najoqqutassamik pisariaqartitamik nassataqarnissaa  
naliliiffigineqarpoq.

*Aammattaaq CV-liornerit kommunimut isumalluutininik pisariaqartitsissasut Kommuneqarfik  
Sermersuup oqaatigaa, taamaattumillu atuutsitsilernerup nalaani sulisunut immikkut  
aningaasatigut isumalluutissanik immikkoortitsisoqassasoq qinnutigalugu, kiisalu  
suliffissaaleqisunut CV-liornermik pikkorissartitsisoqarnissaanut immikkut aningaasanik  
isumalluutissanik immikkoortitseqqusilluni.*

Kommune suleriaatsit allanngortitarinernik misigisaqassasoq, allaffissornerminili  
akitsuineramik misigisaqassanngitsoq oqaaseqaatini allassimasoq tassunga oqaatigineqassaaq.  
Taamatuttaaq oqaatigineqassaaq suliffissarsiortunut CV-liornermik pikkorissartitsisoqarnissaq  
siunertarineqanngitsoq, kommunili suliffissarsiortunut namminneq taamatut  
suliaqarsinnaanngitsunut CV-liornermik immersuinerimi ikiorsiisassasoq.

*Kommune Kujalleq nalinginnarmik siunnersuummut iluarinnippoq, suliffissarsiortunullu  
iluqautaasussamik sunniuteqarluarnerusumik suliamik isumaginnittarnermik, kiisalu  
takunnissinnaanerunermik ataqatigiissaarinerunermillu siunnersuutip nassataqarnissaa  
naliliiffigalugu. Siunnersuummit aningaasaqarnikkut allattoqarnikkullu kingunerisinnaasanik  
naatsorsuuteqartoqartariaqartoq Kommune Kujalleq naliliivoq, kommuninullu tapiissutinik  
annertunerusunik pisariaqartitsisoqarnissaa naliliiffigalugu.*

Tassunga oqaatigineqassaaq oqaaseqaatini allassimamat kommunit suleriaatsiminni  
allannguuteqarneq misigissagaat, allattoqarfimminnili akitsuineq misigissanagu.

*KANUKOKA nalinginnarmik siunnersuummut iluarinnippoq. Taamaattorli tamakkiisumik  
imalimmik CV-qarnerup suliffissarsiortup suliffissarsiortutut isigineqarsinnaaneranut  
piumasagaataanissaa KANUKOKA-p nangaanartoqartippaa, suliffissaaleqisutut  
taaguutigisartagaq nassuiarneqarluartutut taaguutaannginneranik KANUKOKA  
isumaqarami.*

Tassunga oqaatigineqassaaq suliffissarsiortoq naqitsivigitinniarluni  
suliffissarsiuussisarfiimmut saaffiginnikkaangat immersugassaq assigiissagaq  
immersorneqarsinnaasoq atornerqarsinnaasoq. Suliffissarsiuussisarfiit suliffissarsiortup CV-  
minik immersuineranik isumannaarinissamat ikiuussinnaavoq, taassuminngalu suliffinnut  
nittartakkamat inissiisissinnaallugu. Ullumikkut suliffissaaleqiarneq tunngavigalugu  
suliffissaaleqisup pisortanit ikiorsiissutinik imaluunniit suliffissaaleqinerimi ikiorsiissutinik  
pisariaqartitsiuarneranut naqitsisarneq nalunaarsuutaavoq. CV-mik immersugassamat  
nalunaarutinik tunniussaqrneq nalinginnaasumik suliffissaaleqisutut siullermik  
nalunaaruteqarnermut atatillugu pisassaaq, taamaalillunilu ullumikkut pisortanit  
ikiorsiissutisinarluni nalunaarsuisarnermut pissusissamisoortutut ilaassalluni.

Suliffissarsiortup CV-anik suliffinnut nittartakkamat inissiisoqanngippat suliffinnut  
nittartakkamat siunertaq pingaaruteqartupilussuaq annaaneqassaaq. Suliffinnut nittartakkamat

pingaarutilittut siunertat ilaat tassaavoq suliffinnut inuttaligassanut suliffissarsiortut tulluarsagaanissaannut suliffissarsiuussisarfiit sakkussamik sunniuteqarluartumik pissarsinissaannik isumannaarinissaq. Tamanna pisinnaassanngilaq suliffissarsiortut amerlasuut suliffinnut nittartakkamut nalunaarsugaanngippata, tamatumalu aamma nunanit allanit sulisartut ikilinnissaannik anguniagaq ajornakusoortissavaa.

Aalajangersakkap maalaaruteqartarnermut agguataarineq allanngortitaqarfiginngilaa, taamaattumillu pisortat ikiorsiissutaat pillugit inatsisaasunut aammalu suliffissaaleqinermi ikiorsiissutit pillugit Inatsisartut inatsisaannut tunngatillugu aalajangiinernut tunngatillugu naammagittaalliuutinut oqartussaasoq tassaavoq Isumaginninnermi Naammagittaalliuuteqartarfik, aammalu suliffeqarnermi innersuussisarneq il.il. pillugit Inatsisartut inatsisaannut tunngatillugu aalajangiinernut tunngatillugu Naalakkersuisut tassaapput maalaaruteqartarnermut oqartussaasut.

*Aammattaaq tapiissutaasartut aqutigalugit aningaasaqarnikkut kingunissaasinnaasut taarsiivigineqarnissaat KANUKOKA-p naatsorsuutigaa, naalagaaffigisamilu suliffinnut nittartakkap ineriartortinnissaanut atatillugu erseqqinnerusumik piumasaqaataasut periarfissallu pillugit oqaloqateqartarnissat KANUKOKA-p qilanaarai.*

Tassunga oqaatigineqassaaq kommunit suleriaatsiminni allannguuteqarneq misigissagaat, allattoqarfimminnili akitsuineq misigissanagu.

*IMAK siunnersuummut oqaaseqaatissaqanngilaq.*

## **Inatsisissatut siunnersuummi aalajangersakkanut ataasiakkaanut oqaaseqaatit**

### *§ 1-imut*

Nr. 1-imut (§ 10, imm. 1)

Suliffinnut nittartakkap siunertaa tassaavoq Kalaallit Nunaanni naalagaaffigisami suliffinnik niuerfiusumik pitsanngorsaaneq aammalu suliffissaaleqinerup annikillisarnissaa. Suliffinnut nittartakkap atorfiit, nunami maani suliffissarsiortunik piginnaanilinnik peqaraluartoq nunanit allanit sulisartunik inuttaligaanissaat pinaveersissavaa.

Suliffissarsiortunik, suliffinnillu inuttaligassanik nalunaarsuinernik suliffinnut nittartagaq sakkuussaaq, suliffinnullu nittartagaq tunngavigisanik paasissutissanik aamma pitsanngorsaaneq atugassanik naatsorsueqqissaarinernik tigusaqartarnissamut periarfissiivoq.

Nr. 1-imut (§ 10, imm. 2)

Suliffinnut nittartakkap Kalaallit Nunaanni tamarmi suliffinnik innersuussisarnermut ilaliullugu atorneqartarnissaanut, aammalu sulisitsisut sulisartullu akornanni attaveqarnermik pilersitsinissaanut aalajangersagaq isumannaarissaaq. Kalaallit Nunaat suliffeqarfittut ataatsimoortitatut isigineqassaaq, taamaattumik suliffinnik innersuussisarneq najugaqarfimmi suliffissaannarnut naleqqiullugu innersuussinerusariaqarani.

Nr. 1-imut (§ 10, imm. 3)

Suliffissarsiortut suliffinnut nittartakkami CV-minnik inissiinissaannik aalajangersagaq peqqusivoq. Suliffissarsiortup suliffinnut nittartakkami CV-qarnissaanik sullississutinik assigiinngitsunik akiliisarnissamut tunngaviulersillugu inatsisini allani aalajangersakkap malitseqartinnissaa naatsorsuutigineqarpoq. Suliffissarsiortup suliffinnut nittartakkami CV-minnik nammineq inissiinnaanngippat kommunalbestyrelsip qanoq iliortoqartarnera suliffissarsiortumut ilitersuutigissavaat, naggataatigullu suliffissarsiortup ilitersorneqareernermini pisinnaassannginnerani CV-mik inissiissallutik.

Nr. 1-imut (§ 10, imm. 4)

Suliffinnut nittartakkami suliffissarsiortup CV-utaata tamatigut nutarterneqartuarsimanissaanik aalajangersagaq isumannaarissaaq. Taamaalilluni pingaaruteqassappat CV-mi allannguutit ilanngussornissai suliffissarsiortup pisussaaffigaa. Taamaalillutik suliffimmut inuttaligassamut inuttassamik eqqortumik innersuussinissaminnut kommunini suliffinnik innersuussisarfiit nassaarniarluarnerusinnaalissapput.

Nr. 1-imut (§ 10, imm. 5)

Suliffissarsiortunut sulisinnaassusilinnullu ikiorsiissutinik assigiinngitsunik akiliisarnermut suliaraqfiusumi suliassanik takkuttussanik aalajangersagaq tapersersuissaaq, taamaalilluni



suliffeqarfimmut isernissamut imaluunniit uteqqinnissamut suliffissaaleqisut aamma sulisinnaassusillit peqataaqataanissaannut pisussaaffeqassalluni, aammalu assersuutigalugu suliffissaaleqinermi aamma pisortanit ikiorsiissutitut ittunik ikiorsiissutinik assigiinngitsunik pissarsisinnaanissamut tamanna piumasaqaataalersissallugu.

Suliffissaaleqinermi ikiorsiissutit pillugit Inatsisartut inatsisaanni aamma pisortanit ikiorsiissutit pillugit Inatsisartut peqqussutaanni piareersimasuunissamik piumasaqaammik aalajangersagaq ilassuteqarpoq.

Suliffissarsiuussisarfinni naqitsisitsiniarluni suliffissarsiortoq saaffiginnikkaangat assigiiaartitamik immersugassamik immersorneqarsinnaasumik atuisoqarsinnaavoq. Suliffissarsiuussisarfiiit suliffissarsiortup CV-minik immersuinissaata isumannaarnissaanut isumaginnissinnaapput, taannalu suliffinnut nittartakkamut inissitsissinnaallugu. Suliffissaaleqisut tulluartsarsiuussassani 2-imi aamma 3-mi inissisimasut suliffinnut nittartakkamut CV-iminnik ikkussigunik, taakkua suliffissarsiortuunngitsutut nalunaarsorneqassapput, pissutigalugu taakkua sulilernissamut piareersimasutut nalilerneqannginnamik. Tulluartsarsiuussassani 2-imi aamma 3-imi inissisimasunut taamaalilluni CV nalunaarsuinertut atuutissaaq.

Aalajangersakkap maalaaruteqartarnermut agguataarineq allanngortitaqarfiginngilaa, taamaattumillu pisortat ikiorsiissutaat pillugit inatsisaasunut aammalu suliffissaaleqinermi ikiorsiissutit pillugit Inatsisartut inatsisaannut tunngatillugu aalajangiinernut tunngatillugu naammagittaalliuutinut oqartussaasoq tassaavoq Isumaginninnermi Naammagittaalliuuteqartarfik, aammalu suliffeqarnermi innersuussisarneq il.il. pillugit Inatsisartut inatsisaannut tunngatillugu aalajangiinernut tunngatillugu Naalakkersuisut tassaapput maalaaruteqartarnermut oqartussaasut.

CV-p tamakkiisumik imallip imarissavai ateq, inummut paasissutissat, aamma attaveqarnissamut paasissutissat, taamaalillutik kommunalbestyrelsip sulisitsisoriligassallu suliffissaaleqisumik kinaassusersinnaallutillu attaviginnissinnaalissammata. CV-p tamakkiisumik imallip aamma imarissavai ilinniagarisimasanut paasissutissat, suliffeqarnermit misilittakkat atorfigiligassamullu kissaatigisat, taamaalillutik kommunalbestyrelse sulisitsisoriligassarlu suliffissaaleqisup piginnaasaanik kissaatigisaanillu paasissutissanik pissarsisinnaassammata.

## *§ 2-mut*

Imm. 1-imut

Inatsisartut inatsisaata 15. juli 2015-imi atuutilernissaa siunnersuutigineqarpoq.